



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim tir\_yimiyim

tir yimiyim TAPAK 3

**Abbott aser Doggett na Australia team nung zungoksemogo**

**Delhi election atema AAP-Cong melokteptsü: Kejriwal**



VOL. XXII ISSUE NO. 53 (ADOK 53) DIMAPUR TENTONÜ (MONDAY) LUCHII (DECEMBER) 02, 2024 ₹ 5.00

## Nagaland state küm 62 jungogo 25 buba Hornbill Festival kanga meraketa tenzükogo

**Dimapur, December 1, 2024 (TYO):** Deobamü Civil Secretariat Plaza nung 62 buba Nagaland Statehood Day mongogo.

Iba sentong nung chief minister Neiphiu Rio-i o jembidang senso shiai state temaba jenjangi anir atutsüba nung shilem agütsü ayongzük.

Eastern Nagaland People's Organisation-i Frontier Nagaland Territory meshiba atema November 6 nü state sorkari MHA nem draft memorandum ka agütsüogo. Iba ya senso ajak külemi rongsenketzung renloksü aser tesentaktep yur putu tasen kati ayaoka aitsü atema lir" ta CM Rio-i ashi.

Naga yimten teblemetsü atema November 21 nü CM Rio den külemi cabinet zungsemtemi Union home minister Amit Shah den ajurutepogo aser onük aika lemsatepogo, ta pai ashi.

State sorkari Naga yimten latettsü atema tongti süa temulung agüja inyaker saka Naga political groups tasentem tentetba den parnok sasep nung mangatettep adokba ajanga tayongzükba aika ajurur ta CM Rio-isa metetdaksü.

Küm 20 jungnüa süia aruba sülen Nagaland nung 33% reservation for women lia urban local bodies election agiogo ta paisa ashi.

Power department-i Central Electricity Authority den transmission plan tajung ka renemogo aser iba ya 2030 tashi nung Nagaland nung 360MW projected load demand atongtsü atema transmission system ka amenoktsü atema lir ta CM Rio-isa ashi.

Department of Information Technology & Communication-i Guideline for Granting Right of Way (RoW), 2024 yanglushiba

metetdaksüogo aser iba ya Telecom Infrastructure amenoktsü atema lir, ta paisa ashi.

Department of Animal Husbandry & Veterinary Services-ia Tseminyu aser Mangkolemba nung Veterinary Hospitals ana lapokogo. Külen, Shamator, Chumoukedima aser Niuland nung veterinary Hospitals asem lapoktsü sentong lir.

Department of Soil & Water Conservation-i aluyimer 74,000 aser ali 74,000 hectares atema micronutrients agütsütsü temulung agütsür ta CM Rio-i ashi.

Nakmati atuba tesemtem nung Acid Mine Drainage atema Ministry of Jal Shakti-i Har Khet Ko Pani (HKKP)-PMKSY kübok Mine Spoil Areas mulunga agizükogo. Iba ya Mon, Mokochung, Longleng, Tuensang aser Wokha district tem nung pilot basis nung mapa inyaker ta paisa ashi.

Nagaland nung Water Transport aser Tourism ajungkettsü atema state sorkari Tizu-Zungki, Doyang Reservoir Dam, Noun Lake, Shilloi Lake nung Inland Water projects inyaksü atema Ministry of Ports, Shipping & Waterways den jembitepdar, ta paisa shisem.

State sorkarisa government sector dak alia mapa inyaksü asoshi maongka aika agütsür aser iba atema scheme aika tenzüktsüogo ta Rio-isa ashi.

Nagaland Statehood Day sentong nung CM Rio-i SMILE App for teacher and employee attendance management aser Hornbill App sayatsü.

Paisa stalls aser photo exhibition lapoktsü aser Lighthouse School Complexes atema lung azungtsüogo.

### HIV/AIDS aketerrem mesentoktsü ayongzüker

**Kohima, December 1, 2024 (TYO):** Health and Family Welfare Minister P. Paiwang Konyak-i HIV keta aliba aliba nisungtem mesenmetua amshiba anentsü ayongzükogo.

Naga Heritage Village, Kisama nung Nagaland State AIDS Control Society (NSACS) Stall nung World Aids Day sentong agidang Minister Paiwang-i iba tayongzükba agütsü.

Asenoki HIV/AIDS anema inyaka aruba nung takok ngua arudar aser iba global health tayongzükba anema maneni raratsüla ta pai ashi.

Mozü tajungba yangluba den antiretroviral therapies ajanga HIV ya tashidak tulu ka nungi anepalutetba tashidak ka kümogo saka HIV/AIDS aketerrem mesenmetua aser bendanga amshiba tangatetba ano lir ta Minister Paiwang-i ashi.

"Asenoki ajaki education, testing, aser treatment angutsü atema külemi inyakdi. Asenoki nisung ajak agizüketba tangatetba

adoktsü aser HIV aketerrem akhümtsüba anepalutsü tangatetba prokshidi" ta paisa ashi.

Paiwang-isa nisungtem dang temelenshi bener arur ambassadors asütsü ayongzük.

Kisama nung NSACS stall nung taruba anogo 10 nü HIV menatepba noktangtsü atema osangtem prokshitsü aser anepalutsü ta Commissioner & Secretary Health & Family Welfare and Chairman NSACS Anoop Khinchi-ia ashi.

World Aids Day sentong nung Minister Paiwang-isa awards balala agütsü.

Nagaland nung küm 20 tema ART agia taküm aliba atema Jailu Gonmei nem sempet ka agütsü. UNAIDS first 95-95-95 goals atongba atema Dimapur district nem sempet agütsü.

Red Ribbon Club member Japfu Christian College Kigwema, Nohoru Rhetso-i World AIDS Day 2024 amongdang mezung HIV testing mulunga aruba atema sempet ka agütsü.



**Kohima, December 1, 2024 (TYO):** Kisama nung Naga Heritage Village nung 25 buba Hornbill Festival lapokba sentong nung nisung meyrjang aikati shilem agiogo.

Iba sentong nung Task Force for Music and Arts (TaFMA) kübok Naga artist-i sobaliba aser tanü putu meyokteper shilem balala agia liasü. Maneni partner countries - Japan, Welsh aser Peru nungi sobaliba shilemtem agiogo.

Nagaland Governor La. Ganesan aser Chief Minister Neiphiu Rio nati Naga gong tema benjung lapoktsü. Külen, Kohima Village nung Head Gaon Burah (Village Chief) arishi küm 85 tain Medoo Keretsu-i sobaliba temoatsü aser Bishop of Kohima, Most Rev Dr James Thoppil DD-i temoatsü meshia sarasadem.

Padma Bhushan, Grammy & Oscar winner Dr A R Rahman-ia sentong nung pa indang nungtuken 'Nadaan parindey ghar aja' aten.

Rahman den külemi Ambassador Extraordinary and Plenipotentiary of Japan to India Keiichi Ono; Ambassador of the Republic of Peru to India Javier Manuel Paulinich Velarde, British High Commissioner to India

Lindy Cameron, CB OBE; Country Director, India, British Council Division and Minister Educational and Cultural Affairs Alison Barrett MBE; Director of International Relations & Trade, Welsh Government; Deputy Chief of Mission, United States Embassy Jorgan Andrews and Chairman Suchirindia Group of Companies & Suchirindia Foundation aser Hon. Consul, Republic of Bulgaria, Dr Y Kiran Kumar nungeri Naga sobaliba aser inyaksangshi atema tenüngsang agütsü.

Parnokisa Naga nunger den music, education, health care aser youth partnership dena wadang balala nung külemi inyaksangshia aotsü metetdaksü.

"Tanü asenok Kisama nung adenshia Nagaland nung sobaliba takar benjungtepba reprangba dang masü saka shilem agir" ta Governor Ganesan-ia ashi.

Iba benjung ya "Festival of Festivals" ta ajar aser iba ajanga asen sobaliba sayur. India longjema aliba aser nisung temeyokteper aliba tamaittsü sayur ta pai ashi.

"Küm 25 tashi benjung monga aruba mapang asenoki kechi ajangetetogo ibaji meyipa

reprangshidi" ta Ganesan-isa ayongzük.

Alima tesem balala nungi arurtem aser India kübok tanga state tem nung arua shilem agirtem yangi aruba ajanga sobaliba aser tesem balala süaka ka küma longjema sayur. Asenok külemi yamai ajangshiba ajanga kati ka tali angatetteper ta pai ashi.

Iba benjung ajanga Naga nunger sobaliba takar sayur aser alemli nungi oboula nunger senmang wazüka ayur ta Chief Minister Rio-i ashi.

Iba benjung ajanga kin aser nisung ajak telongjem aser ka akümba tangatetba kübok anidener. Kümtem süia arudang iba benjung ajanga alima tesem balala nungi nisungtem anidener aser meimchir ajungtsü atema sendakteper, ta pai ashi.

"Iba benjung ya Naga nunger sobaliba aser inyaksangshi indang dang masü saka Naga nunger tarutsü atema tashi itdaksür" ta Tourism Minister, Temjen Imna Along-ia ashi.

Hombar nungi Art and Culture Department ajanga "Cultural Connect" ta ser sentong agidang Nagaland nung kin 18 nungi nisungtemi shilem balala agia aotsü.

## CM Rio aser A. R. Rahman nati CEMA lapoktsüogo

**Dimapur, December 1, 2024 (TYO):** Deobarnü Chief Minister Neiphiu Rio aser Padma Bhushan, Grammy & Oscar winner, Dr. A. R. Rahman nati Ministers' Hill, Kohima nung Centre of Excellence for Music & Arts (CEMA) lapoktsüogo.

Iba sentong nung Deputy Chief Minister & National Highways Minister T. R. Zeliang, aser Deputy Chief Minister & Minister in-charge of Home Department, Y. Patton na aden.

"Centre of Excellence for Music & Arts lapoktsüba ya kü pungmang ka dang masü saka musicians aser artists nungeri aginüba ka liasü. State sorkari akokba tashi lanurtem music & arts, sports nung yaritsü" ta Chief Minister, Neiphiu Rio-ia ashi.

"Dr. A. R. Rahman-i Nagaland tonga aruba atema kanga pelar aser state sorkari tarutsü nunga pa den tesentaktep lia inyaksangshia aotsü imlar. Pai tanurtem, tangar memeneperem yariba aser anitetba atema tenüngsang agütsür" ta pai ashi.

Naga nunger music, arts aser sports ajanga sabang ka kübok anidentsü imlar. Nagaland ya 'land

of festivals' dang masü saka 'land of music' ta ajatsü teimla lir, ta CM Rio-isa ashi.

"CM Neiphiu Rio-i lanurtem yariba aser anitetba aser talisa mapang ajak nung musicians & artists yariba atema kanga pelar" ta TaFMA Chairman, Theja Meru-ia ashi.

Dr. A. R. Rahman-i Nagaland nung lanurtem ajungmesoba aser music wadang nung teti yaria aruba atema pelar ta pai ashi.

Padma Bhushan awardee, Dr. A. R. Rahman ya singer, songwriter, music composer aser record producer ka lir aser pai iba sentong nung adenba atema pelaba metetdaksü.

Ni music meimba aser angazüktsü jangraba ajanga Nagaland tonga aruogo aser maneni Naga nunger musicians aser artists-i ajungmesotsü imlar ta Rahman-ia ashi.

Iba sentong nung A. R. Rahman-isa Headhunting to Beatboxing ta ser pai yangluba musical documentary ka 2025 Palm Springs International Film Festival nung sayutsü shimtetba osang lemsatep.

Chief Minister Rio-i Nagaland

nung lanurtem yariba aser parnok pungmang aser tejangraba ataloktsü atema inyakba asoshi tenüngsang agütsür, ta Advisor to Chief Minister, Nagaland, Abu Metha-ia ashi.

"Küm 20 tejakdang CM Rio-i Nagaland nung music and arts ajungkettsü atema special purpose vehicle ka alitsü mangdang ayu aser tanü iba ajanga takok aika ngua global platform nung Nagaland densomogo" ta Metha-ia ashi

"Ita ishika tejakdang Nagaland Madrigal Singers-i World Choir Games nung gold medals ana angu. 2023 nunga Nagaland Chamber Choir-i 12th World Choir Games nung gold medals ana angu. Asen lanurtemi Nagaland asoshi dang masü saka India asoshi konang aika bentsür arur aser iba ya Chief Minister ajanga state sorkari lenmang lapoktsü ajanga lir" ta paisa metetdaksü.

Centre of Excellence for Music & Arts (CEMA) ya Special Assistance to States for Capital Investment kübok Rs. 5.00 Crore endoka yanglu. Iba ya Youth Resources & Sports Department-i ketdangtsüa reprangtsü.



# NH New Delhi nung Statehood day mungogo



Resident Commissioner, Wennyei Konyak den Nagaland House officers aser staff tem tangokba noksa nung angur.

**Dimapur, Luchii/December 1 (TYO):** December 1 nü Nagaland House, Dr. APJ Abdul Kalam Road, New Delhi nung 62buba Nagaland Statehood Day mungogo.

Iba sentong nung Nagaland House (NH) New Delhi ketdangsür tejentem aser staff temi shilem agi aser Resident Commissioner, NH New Delhi, Wennyei

Konyak-i linük wako salaja liasü.

Sentepa aliba lokti den o jembiba mapang Resident Commissioner, Wennyei Konyak-i, küm 62 tsüingda state lenla aika nung renlokaogo aser iba atema tenüngsang agütsütsüla, ta ashi.

Paisa, sorkar tenzükertem dang parnok koba jenjang nung sorkar

tenzükdir tenzükaka, iba ajanga state tejakleni renloka aoba nung kongshitsü ta shia parnok dang bendanga agüja tenzüksü ajungshi.

Paisa, employee aser staff tem dang pei mapa asoshi pei shisatsü aser sempet/tasatem maneni arantgetshia alitsü, aser angazüksü aser tajungba akümtsü atema azümesena malitsü ajungshia liasü.

# Tesayur aser employee tem atema SMILE App amenokogo

**Dimapur, Luchii/December 1 (TYO):** Tesayur aser employee tem attendance atema SMILE App amenokogo.

SMILE App ya Department of School Education (DoSE) kübok Nagaland Education Project-The Lighthouse (NECTAR) indang inyakyim ka lir. Iba App ya attendance agitsü, leave application, aser status tracking atema facial recognition, timestamping, aser geofencing amala advanced technology amshiba comprehensive tool ka lir.

Iba App ajanga

administrative practices aser data-driven decision-making tajungba kümdaktsütsü aser education system nung inyakyim ajak merek mereka kümdaktsütsü meranger. App ya technical skill koma bena lir aji kecha mezüngshi-i employees ajaki amshiteter.


Iba App teti amshiba ajanga modern technology balala amshiyim tezübaba kümdaktsütsü aser iba ajanga professional terenlok nunga teyari agütsütsü aser Nagaland ya digital aser data-driven system kati melentsü atema

teyari agütsütsü.

SMILE App yagi data integrity tajungba kümdaktsütsü aser administrative khuret tajemba kümdaktsütsü aser proxy attendance aser manual record ayuba amala tetsükdaktsütem bentetja school resources achaayangba tajungba kümdaktsütsü.

SMILE App ya school tem nung 2025 academic session tenzükba mapang nungi amshitsü aser Department establishments nung 2025 küm January 2 nü nungi amshi tenzüksü.

# DAPCU & HIV Partners na longjemer NACO World AIDS day mungogo



**Dimapur, Luchii/December 1 (TYO):** December 1 nü District AIDS Prevention and Control Unit (DAPCU) & HIV PARTNERS na longjemer National AIDS Control Organization (NACO) AIDS DAY mungogo.

Iba sentong ya DAPCU aser HIV Partners na longjemer Impur Bible Seminary Hall nung agia liasü. Sentong ya NSACS-i sponsor süa liasü. Iba sentong ya "TAKE THE RIGHTS PATH" omen nung ajemdaker agiogo.

Sentong nung DPO, DAPCU, Mokokchung District Makshi Jamir-i, iba anogomung koda tongtibang iba indang lemsatp. Pai ashiba agi, World AIDS Day ya bilemtetshitsüba aser jenjang agitsüba anogo ka lir. Iba anogo HIV/AIDS indang

tangazükba agütsütsü kanga tongtibang lir.

Makshi Jamir-isa, iba anogo ya AIDS tashidak agi asürtem bilemtetba anogo ka lir aser HIV/AIDS keter alirtem nongita yaritsüba anogo ka lir, ta ashi. Pai, sentepa alir ajak dang iba tashidak nungi jenboa alitsü aser temang anepalutsü asoshi inyakyim ajungkettsü ajungshi. Maneni pai, ajak longjemer HIV/AIDS anema raratsü ayongzüka liasü.

NMP + MKG tir Temsuwapang Jamir-i, NMP+ ama pa tajangshiba lemsatp. Pai sentepa aliba lokti dang tashidak keta alirtem mesenmetui amshiba anentsü aser HIV keter alirtem nongita yaritsü atema environment ka yanglutsütsü mepeshi. Nüsasa educate süang, ola adoka jembiang aser nisung ajak dang

akümtsüba benshiang. HIV ya death sentence ka masü. Treatment agiba ajanga nisung ka taküm kümzüktettsü, ta pai ashi.

Sentong nung CPO, Mokokchung Yashi Jamir-i, HIV AIDS dak sendakba nung tangazükba agütsü aser Impur Bible Seminary kaketshirtemi ken tajung ka tena liasü. Kasa mapang nung Principal, Impur Bible Seminary Imtilemla Longkumer-i Tsüngrem o jembia liasü.

Iba sentong nung nisung 300 shi-i shilem agia liasü.

DAPCU-isa, nikongtsütsü MEDICAL OFFICE conference Hall nung candlelight Vigil asr sarasadem sentong ka ayongzüka agiogo. HIV AIDS agi asürtem aser HIV keta alirtem bilemteta iba sentong agia liasü.

# Neiphu Rio-i stall balala lapoktsü

**Dimapur, Luchii/December 1 (TYO):** Nagaland sorkari ayongzüka December 1 nü Secretariat Plaza nung 62buba Statehood Day mungogo.

Nagaland Chief Minister, Neiphu Rio-i, sorkar department aser agency balala indang stall tem lapokja liasü.

Statehood Day nüngdem nung Department of Information and Public Relations-i, Photo exhibition ka ajanga 1963 küm nungi tanü tashi state sorkar inyakyim aser takoktem sayua liasü.

Noksatem nung 1963 küm December 1 nü state semzükba anogo tangokba noksa, Statehood Day amungba, Nagaland nung district tem, Nagaland Heritage Village

Kisama, Hornbill benjung, tang aser taoba mapang terenlok maparentem, office lapokba tem, 16th Finance Commission-i semdangba aser anüing nungi Kohima jila tangokba noksa densema lir.

Sorkar department balala indang stall tem rongnung Nagaland Institution of Medical Sciences and Research (NIMSR), Agriculture Department-i aluyimertem atema aluyimba nung amshiba hadir balala sayaba stall, T.Khel Kohima Village, Nagaland State Rural Livelihood Mission (NRLM), Department of Rural Development (RD)-i nongita yariba local products tem Kohima RD Block-i sayuba densema liasü.

# Hornbill nüngdem nung army-i ayongba motor rally tembangogo



**Kohima, Luchii/December 1 (TYO):** Nagaland nung 25buba Hornbill benjung nüngdem nung Mahindra & Mahindra den longjemer Indian Army-i anogo pongu atema motor rally ka ayongzüka agiogo.

Iba rally ya Rangapahar Military Station nung tenzük aser iba sülen Jorhat, Mokokchung, Wokha, aser Kohima ajanger külen Zakhama nung tembangogo.

Rally nung nisung 20 aser Mahindra & Mahindra-i sponsor asüba SUV 8-i shilem agia liasü. Iba ajanga Nagaland indang sobaliba tushitsü atema longjemer inyakba sayur. Iba

sentong ajanga Indian Army aser Nagaland nung aliba nüburtem tsüingda tesendaktep aliba sayuba dang masü saka iba ajanga telongjem resilience, aser exploration tanül ajungketer.

Iba motor rally ya 25buba Hornbill benjung nung tongtibang sentong ka liasü aser iba ajanga telongjem adokdaktsür aser sentong nung shilem agirtem nem tajangshiba tajung agütsüba den terprangertem nema tajangshiba tajung agütsügo, ta Ministry of Defence RO & otongdari sangdong ka ajanga metetdaktsü.

# TRZelaing-i Multimedia Exhibition lapoktsü

**Dimapur, Luchii/December 1 (TYO):** Deputy Chief Minister of Nagaland aser Minister in-charge of Planning & Transformation and National Highways, T R Zelaing-i tanü anogo 10 sayatsü aliba Multimedia Exhibition lapoktsügo.

Multimedia Exhibition ya Ministry of Information & Broadcasting kübok Central Bureau of Communication (CBC)-i ayongzüka Naga Heritage Village, Kohima nung lapokgo.

Sentong nung ADG, Central Bureau of Communication (CBC) Guwahati, Ministry of Information & Broadcasting Kripa Shankar Yadav-i tetushi tejaoker ama shilem agia liasü.

Exhibition lapoktsüba sülen T R Zelaing-i exhibition semdang, kong Akashvani Kohima indang antique aser modern equipment tem saya-a liasü.

Sentong nung o tatsüka jembiba mapang ADG Kripa Shankar Yadav-i ashiba agi, iba exhibition ayongzüka

nükjidong tongtibangtibaji Centre sorkar aser Modi 3.0 indang Flagship Schemes aser Policy balala aser 2047 küm tashi nungbo India kanga junga renloker lidaktsütsü jenjang agibatem sayatsü atema lir.

Item scheme aser police tem ajanga tajangzük agütsübatem multimedia aser digital exhibition tem ajanga nüburtem nem agütsüdar, ta pai ashi.

Tesemdangertemi item Centre sorkar indang scheme aser policy tem indang ya augmented reality, virtual reality, sound shower aser digital puzzles amala advanced technology tem ajanga tali tajungba angatettsü, koba exhibition nung tokja lir.

Anogo 10 atema exhibition ayonzükba nung sobaliba tsüngsang tetoktepba, sobaliba saya balala, otsü shitepba aser Centre sorark flagship program tem dak ajemdaker quiz tetoktepba amala agitsü. Tetoktepba balala nung takok angurtem nem sempet agütsütsü.



# Bangladesh nung Chinmoy Das den külemi inyaker putir ana puogo



December 01, 2024 nü Bengaluru nung International Society for Krishna Consciousness (ISKCON) lenirtem aser züngsemtemi Bangladesh nung Hindu lenir, Chinmoy Krishna Das apuba anema longkak aيتدang tangokba noksa nung angur.

**New Delhi, December 01 (Agencies):** Tawa Bangladesh nung Iskcon putir Chinmoy Krishna Das apuba sülen Hindu nungertemi longkak aitba mapang nung Honibarnüa Das den külemi inyaker putir ana puogo, ta Iskcon Kolkata tatong Tir, Radharamn Das-i metetdaksü. Osangbener den jembidang Radharamn-i, “Bangladesh nung police-i ano Iskcon putir ana puogo, ta kü nem osang metetdaksüogo,” ta ashi. Hokolbar aonung Radharamn Das-i X ajanga, “Osang tamajung nguogo:

Chinmaya nem ‘prasad’ agütsüi aoer tamanger ana tekülem kidang nungi meyipa aruba mapang nung apu. Chinmaya indang secretary-a samaogo. Parnok asoshi sarasademjang,” ta metetdakja liasü. Radharamn Das-i, Krishna Das apuba sülen anogo ishika tsüngda Chattogram nung Hindu putir aser Iskcon züngsem, Shyam Das Prabhu-a puogo, ta metetdaksü. Radharamn Das-isa social media ajanga, “Tanüa Chhattogram nung police-i Brahmachari Sri Shyam Das

Prabhu puogo,” ta metetdaksü. Radharamn-i, Bangladesh kübok Bhairav nung aliba Iskcon center ka maakogo, tensa mesüngjemer aser Bangladesh nung Iskcon züngsemtem atema shisabulua bilemstür, ta metetdaksü. Tan hopta tetenzükeln taoba mapang Iskcon züngsem, Chinmoy Krishna Das-i Bangladesh linük wako mezüngmeshi, ta pa nem tai tonglokja apuba sülen linük tesem aika nung tensa raksaogo aser India sorkaria Das chiokang ta akhanger.

# Gari lenmang nung asür 5 nungi 1 bo tetsüng agi jajartem liasü

**New Delhi, Luchii/December 01 (Agencies):** 2023 küm gari lenmang lendong nung asür nisung pongu shia nungi kabo tetsüng agi jajartem liasü aser gari lenmang lendong nung asürtem shilem 45 bo two-wheelers nung senzürtem liasü. Union road transport minister, Nitin Gadkari-i, “Yaküm lenmang nung gari lendong balala nung nisung lakh 1.72 dak tali süogo aser asürtem rongnung 35,000 bo tetsüng agi jajartem liasü,” ta metetdaksü. Lucknow nung sentong ka nung jembidang Union minister-i, küm shia linük nung gari lendong lakh 5 jungnüa ataloker aser yaküm gari lendong nung asür 10,000 bo arrshi küm 18 ser tekübokpurtem liasü. Gari lendong 35,000 bo schools aser colleges kima anasa atalokbatem liasü,” ta metetdaksü. Union minister-isa, “Gari

lenmang lendong nung asür 54,000 bo two-wheeler nung merang korang masemertem liasü, asür 16,000 bo gari nung seatbelt magirtem liasü aser asür 12,000 bo gari nung nisung tali amenba agi liasü. Gari lendong 34,000 bo driving licence malirtemi aniba gari liasü,” ta metetdaksü. Yakümbo road transport ministry aser National Crime Records Bureau (NCRB) napronglai gari lendong nung nisung asüba report (2022 report) magütsüi liasü. 2023 küm gari lendong nung nisung teimba asüba state ji Uttar Pradesh liasü; iba sülen tanabuba aser tasembuba jenjang nung Maharashtra aser Tamil Nadu na liasü. Union Minister Nitin Gadkari-isa, alima nung gari lendong nung nisung teimtiba asüba linükji India lir, ta

metetdaksü. “Yaküm Uttar Pradesh nung gari lendong tatalokba 44,000 liasü aser item lendong nung nisung 23,650 asü. Asürtem rongnung nisung 1,800 bo arrshi küm 18 ser tekübokpurtem liasü aser asürtem 10,000 bo lenmang nung tetsüng agi jajartem aser two-wheeler nung senzürtem liasü. Uttar Pradesh nung gari kanga kera aniba ajanga lendong ataloka asür 8,726 liasü,” ta paisa metetdaksü. “Gari lendong atalokbaji kuli balala ajanga lir, ajisüaka tongti kuliji meimchir aibelen ajanga lir. Atangji gari lenmangtem nung ongken lir, underpasses aser tetsüng agi jajartem atema apu peria mali. Onoki lendong ataloktsüsa aliba tesem jangjaa sen crore 40,000 indoka National Highways yanglushiogo,” ta pai metetdaksü.



December 01, 2024 nü Sambhal nung Judicial commission nung züngsem asem- retired Allahabad High Court judge Devendra Kumar Arora, retired IAS officer Amit Mohan Prasad aser retired IPS officer Arvind Kumar Jain nungeri Shahi Jama Masjid tesem semdangba mapang tangokba noksa nung angur.

# Delhi election atema AAP-Cong melokteptsü: Kejriwal

**New Delhi, December 01 (Agencies):** Amongnü AAP tongti lenir, Arvind Kejriwal-i, taruba Delhi assembly election atema AAP aser Congress na melokteptsü, ta metetdaksü. Osangbenertem senden ka nung jembidang pai, “Delhi nung teloktep malitsü,” ta ashi. Taküm küm tetenzüklen Lok Sabha election nung Delhi nung opposition INDIA teloktep kübok AAP aser Congress nati longjemer toktepa liasü. Delhi nung Lok Sabha menden tenetprongla nung BJP-i takok ngua liasü.

jembir, ta aitsü. Honibarnü Delhi kübok Malviya Nagar nung nisung kati Kejriwal dak tzi shilokja liasü. BJP maneni aija Kejriwal-i, BJP-i ochimashi inyaker, kechiyong taruba Delhi assembly election nung parnoki tasembenbuba tamakok angutsü ta parnoki meteta dang lir, ta ashi. Anogo ana tejaklen Delhi Congress Tir, Devender Yadav-ia, Congress-i shinga den-a meloktepi assembly menden 70 prongla nung tokteptsü, ta metetdakja liasü. Paisa, Delhi election nung party nungi chief minister candidate malitsü; Delhi nung nüburtemi AAP aser BJP yimsüsüba agi melung mesüi melelar, ta metetdakja liasü. Delhi nung AAP sorkar aija Yadav-i, “Teintet sensotemi old age pension mangur. Sensakertemi ration card mangur. Gari lenmangtem raksaogo. Mopung menenba joko mazüoktetsüsa kümogo. Lanurtem mapa mangur. Jenjang atuba agi tetsürtem jashir. AAP-i lapokba Mohalla Clinics ya sayatsü atema dang lir. Iba ya Kejriwal model lir,” ta aija liasü. Congress-i küm 15 tashi Delhi yimsüsüa aruba sülen taoba assembly election anaprongla nung Congress-i menden ka nung danga takok tashishiba agütsürtem aputsü ta

AAP aser Congress natisa Haryana Assembly election nung lokteper tokteptsü jembisa saka menden lemsaba tsütsü telemtetba magitetba ajanga peipei sasep nung toktepa liasü. Centre nung BJP-i aniba sorkar aija Kejriwal-i, Delhi nung tzüzüng-ozüng tensa majungba ya Centre ajanga lir, ta metetdaksü. November 30 nüa Malviya Nagar nung sentong ka nung pa anema inyak, ta pai ashi. Kejriwal-i, “Kü dak shiloktsüba tzi nung yirutsüsa masü, saka lendong keta alitsüa akok. Tesüba anogo 35 tsüngda tang agi tasembenbuba ni amaker,” ta pai ashi. Taoba mapang Delhi chief minister Kejriwal-isa, Union Home Minister Amit Shah-i aibelenertem masü saka

metetdaksü. November 30 nüa Malviya Nagar nung sentong ka nung pa anema inyak, ta pai ashi. Kejriwal-i, “Kü dak shiloktsüba tzi nung yirutsüsa masü, saka lendong keta alitsüa akok. Tesüba anogo 35 tsüngda tang agi tasembenbuba ni amaker,” ta pai ashi. Taoba mapang Delhi chief minister Kejriwal-isa, Union Home Minister Amit Shah-i aibelenertem masü saka



Chennai, December 01, 2024: Cyclone Fengal süiba sülen Marina Beach nung angopur kati lisem agi nembanga aliba zütsük ka agitetdang tangokba noksa nung angur.

# Telangana nung Maoists telungpur tenet khaset

**Hyderabad, December 01 (Agencies):** Amongnü Telangana police-i Mulugu district kübok arem nung Maoists telungpurtem mita aoba mapang nung telungpur 7 khasetogo. Maoists telungpurtem rongnungji Communist Party of India (Maoist) nung lenirtema ana densema liasü. Telangana police-i ashiba agi, police indang anti-naxal unit, Telangana Greyhounds-i Eturnagaram arem nung telungpurtem mita ao. Tawa Maoists telungpurtemi tribal nisung ana tepsetba sülen parnoki telungpurtem mita aoba operation tenzükogo. Maoists telungpur tenet khasetba tesem nungjagi police-i AK-47 prangpong ana ngutetogo aser maneni bushisüngdangdar, ta police-i

metetdaksü. Police-i khasetba Maoists telungpurtemji CPI (Maoist) Telangana state committee secretary Kursam Mangu (Bhadru) aser divisional committee member Egolapu Mallaiah na den Mussaki Deval, Jamuna, Jai Singh, Kishore aser Kamesh nunger liasü. Brihostibarnü Maoists telungpurtemi melung melemi gram panchayat secretary ka densema tribal nisung ana tepseta liasü. Tribal anaji police nem osang metetdaksürtem lir ta melung melemi telungpurtemi tepset. Tribal anaji Peruru gram panchayat secretary Uika Ramesh aser Uika Arjun na liasü. Maoists telungpurtem jagisa tasü mang ana anasaji shidi ka tokja liasü.





## TIR YIMYIM YIMOBILEM (EDITORIAL)

DIMAPUR TENTONÜ, DECEMBER (LUCHII) 02, 2024

### Kibuba ajurutsü renemba

**T**ang ama Khristmas aru yongyaba tetezü asenok dangi Kibuba arutsüba anogo aser mapang ka asoshi atar. Kibubaji Yisu Khrista aser anogoji Khristmas anogo. Aji oda, Kibuba aruba anogo nung Pa ajurutsü atema renemtsübaji mapa ka dang lir. Ibaji asenoki amangtsüla aser menen nangzüka temulung meyiptsüla. Kibuba Yisu alimai marudang, iba osang bener Yohan Baptitsüba nisungtem dangi yok. Mathi tapu 3:2 nung, "nenok temulung meyipang, kechiaser kotak yimli anasa lir," ta Yohan Baptitsübai ashiba angutsü. Iba mapang shirnoki Yohan Baptitsübai ashiba nung amanga temulung meyip aser Yisu aru ataa liasü, parnoki Yisu aruba reprangtet aser pei akaba ajak toktsür Yisu sülen anidak. Yisu asenok dangi marudang asenok temulungjang tama renemtsüla. Kibuba ka asenok mulungjang nung alitsü arur, anungji kiburi pelatsüsa Pa alidakji asenoki renemer atatsüla. Yisu sülen anidakertemi yamaji renemer ata, kechiyong parnoki Yisuji taküm Tsüngrem chir Khrista ta amang. Atangji, asenok mulungjang nung Yisu Khristaji kibur küma alitsü aser asenoka Pa yimli nung alitsü atema tamasa amangtsü aser temulung meyiptsü nungdaker. Mary kibong maküm aser tebur dena kenyongi memedem, saka kodang Tsüngrem tenyar ajanga na mashisa akümtsü aser tanur ka asotsü aser iba tanurji Tematiba meyong chir asütsü (Luke 1:30-32) ta ashi, lai amang aser langzü, " Ni Kibuba tenzükla, nü o amaji lidakjangma." Luke 1:38. Iba tamangji asenoki bilemdangra tesüngmangtsüka lir. Asen kümtetdakba Yisu Khrista asenok madak kibur küma alitsü atema renemtsü asoshi iba ama tamangji nungdaker. Iba tamang jagi asenok mulung meyipdaksütsü. Aji oda, asenoki Yisu Khristaji Tsüngrem chir ta amangba jagi asenok temulung meyiptsü tenzüker. Atangji, Tsüngrem chir aruba atadang tamang agi asenok mulung renemer atatsübaji jangratemtsüka lir. Temulung meyipba tetezü asenok mulungjang aser asenok jakla yimya kenyongi balaka küma meyiptepba lir. Asenok aikati Yisu Khrista arutsü osang angashiaka mamanger aser amangaka temulung ajunga agi merenemer. Yisu Khrista aru atadang asenoki Khristmas sentong tajung renemer atar mesüra arogo nem tenla tuluka agütsütsü renemer atar. Ajisüaka, asen taküm nung Kibur aruba agizüktsü renembaji ibaji dangbo masü. Pa alimai arudang, yamaji yimsüsür aser tezülur aikati inyak, anungji parnoki Yisuji parnok taküm aser kibong nung Kibur ta magizüktet. Parnoki amongtsümong among, tenla tulu bener arua agütsü saka Yisubo majuru. Tanüa asenok arogo nungger aika Khristmas sentong renemba kija jagi Yisu aruba agizüktsü asoshi jungjunga renemogo ta bilema alitsü. Ajisüaka, iba jagi meperir. Kibuba Yisu Khrista asenok mulungjang nung agizüktsü asoshi tamasa Pa o nung amangdi aser temulung meyipdi. T.Ken 139 : 24 nung ashiba ama, " Oh Tsüngrem, kü dak tamajung kar danga lira, aji repringang aser teti tatem maka lenmangi ni aniang," ta sarasadema Kibuba Yisu agizüktsü atadi.

## OLEMSABANG

### KHRISTMAS SALABA: KHRISTANTEM ASOSHI TEKÜMDANGTSÜ

~ Meyu Changkiri

(Yashi adok nungi...)

#### Tenüng Agi Dang Khristan aser Khristmas Tetezü

Tenüng agi dang Khristan - shirnoki Khristan ta jembir saka Khristai sayuba lemanung nung mejajar - parnok asoshi Khristmas tetezüji kechi? Khristmas benjong aser sentong balala nung parnoki shilem agitsü akok, saka Yisu Khrista asoba tanela benjongmong tangatetba parnok dak malitsü. Parnok asoshi Khristmas benjongmongji lungsotepba inyaka aruba sobaliba ka, kinungertem ajurutepba sentong yanglutepba - chiyongtepba, sempet agütsütepba, küm nung ken Khristmas sentep atenba (tamang nung tashi ita aliba agi masü saka sobaliba ka ama atenba). Parnok asoshi Khristmasji temeimbatem den tanaben ajurutepba pelatepba benjongmong. Parnok asoshi tanela nungdak dang nungi lokti longsotepba temaba. Saka iba ama sobaliba nunga tanelaren shisadangtsü maongka Tsüngremi agütsür. Khristmas mapang molungsoa agütsüba - sempet agütsüba mesüra nungdakbapur yariba - item ajangaji tenüng agi dang Khristan den Tsüngremi jembitsü koka lir. Item maparen ajanga Khristai meimchir temenen nungi alanzüktsü asoshi Pa taküm sempet ka ama agütsüba, Pa temeim indang, tangar asoshi bilemstüba, aser alima tajungba yanglutsü indang tangatetba agütsür.

#### Temeshi Laishiba Nung Khristmas Tetezü

Temeshi Laishiba ajanga shidakba Khristmas tetezüji agütsür. Iba ya Yisu Khrista meimchir ka ama alima nung asoba benjongmong. Khristmas ajanga Tejen Lai mapang nung ainkartemi

shinba ama Yisu Khrista ajanga tekümtet teyimla bener arutsü,. Ajemalua Yisu Khrista nashi ki ka nung asoba otsü jagi Tsüngremi alima dang Pa temeim jungkai adokba indang jembir. Iba ya Tsüngremi tiaksanga inyakba maparen ka masü saka Pai ajemalua inyakba tatishitsü ka ta angatetter. Iba ya ajanga, tiaksanga, molamoshia, toktepba inyakba alima nem Tsüngremi ajemaluba tatishitsü tajung ka agütsür.

Isaia 9:6 nung yamai shin, "Kechiyong asenok nem tanur ka soja lir, asenok nem jabaso ka agüja lir; aser yimsüsüba pa tapubang nung alitsü; aser pa tenüng Tesüngmangtsü, Teshisadanger, Tsüngrem Tashi Tulusang, Teti Tatem Maka Tebu, Yimjung Chuba Chir ta ajatsü." Yisu Khrista ajanga bener aruba teyimla indang shisadangtsü iba Temeshi Laishiba ajanga jembir - yimjung ajanga alirongsen ajak atendanger.

Luke 2:11 nung, sannükertem dang kotak tenyartemi yamai ayimoktsü: "Kechiaser tanü nenok nem Dawid yimti nung Kümtetdakba ka soja lir, paji Kibuba Khrista lir." Iba osang tajung angashir rongnung ajemalu sannükertem tama liasü. Shisabulu, tetsübu, aser terata agi sünger aliba lima ka asoshi iba ya tepela osang. Iba osang ajanga maneni alima nem teyimla tulu agütsür. Iba Khristmas osang ya maongka angur aser tashikar atema dang masü, saka Tsüngremer tekümtet ya meimchir ajak nem agütsüba ta bilemtetdaksür. Kechiyong iba temeim, yimjung, aser tepela osang ya ajak asoshi lir.

#### Otempang

Khristanem Khristmas amongtsü yongyaseta renemba mapang, alima shisatsü aser shi tejangrabatem nem mokokdaksütsüla. Tama tazütsü Khristanem süaka, mesüra tamang nung tashi ita liaka, Yisu Khrista meimchir ka ama alima nung asoba ajanga Tsüngrem den

tesendaktep indang shisadangtsü asoshi iba ya maongka tajung. Tanela nung shidakba Khristmas tetezü mangateti alirtem asoshi Tsüngrem temeim meimchir rong nung maneni lir ta iba ajanga sangoktsür. Khristmas osang ya nisunger shisatsü agi rasaa meshitetba tesüngmangtsü otsü. Iba ya ajanga meimchir tenük agi anguba dang nung tali tarokba dak rongloktsü sayur. Aser iba Khristmas ajanga meküta aliba neburtem den Khrista ajanga agütsüba temeim, yimjung aser tepela lemsateptsü ajungshir.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# ID Card nung yimsü melentsü atema Khristan ka nem temelaba agütsü



Sufyan Masih (abelen) den par tsürabur ana aser court nung pa atema ken o jembitsür, Sumera Shafique (ajichilen nungi tanabuba) noksa nung angur.

**Lahore, December 01 (Agencies):** Pakistan nung Khristan kati Islam yimsü dangi meyip, ta shia judge kati pa ID card nung 'Khristan' ta melentsü atema temelaba magütsüi liasü, ajisüaka tawa judge kati pa indang ID card nung Khristan ta melentsü atema temelaba agütsüogo.

Tamalen Pattoki Civil Judge, Mian Usman Tariq-i, arrshi küm 24 Sufyan Masih-i Islam yimsü dangi meyipogo anungji Khristan yimsü dangi tanaben meyiptsü makok ta obendang agüja liasü, ajisüaka November 16, 2024 nü Punjab province kübok Kasur District, Pattoki nung additional district judge,

Ahmad Saeed-i, ID card nung yimsü melentsü atema Masih nem temelaba agütsüogo ta Masih atema ken o jembitsür, Sumera Shafique-i metetdaksü.

Attorney Shafique-isa, Masih-i pa Khristan ta shiogo aser pai district judge danga ibaji nenshia shiogo, ta metetdaksü.

Lai judge dang, Masih mapa inyakba kibur Asif Ali-i NADRA record nung Masih tenüngji Muhammad Sufyan lir aser pa yimsüji Islam ta shia lir, aser ibaji pa alar ama amshitsü nükjidong nung inyakba lir, ta ashi.

"Masih ya azüng-zülu mashiba nisung ka, anungji pa

nem mapa agütsüsangi data entry operator dang ashibaji pai mangatet. Masih-i kaket nungji kechi zülua aliar memeteti temeyong anem," ta Shafique-i ashi.

November 16 nü Judge Tariq-i, "Islam yimsü ajanga nisung ajak tasodang Muslim nung ta tesayuba agütsür, saka tsüraburtemi tindang lenmang nungi pilar. Anungji kodang nisung kati Islam yimsü agizükdir pa tanaben mezüng ama akümer. Islam yimsü ajanga shinga kangshia yimsü memeyipdaksür," ta ashi.

"Khristantem indang ID card nung metetsümonga Muslim ta züluba tatalokba aika lir. Pakistan nung Khristan aikati azüng-zülu mashi, ibayongji form nung aibelenbaji parnoki memeteter," ta lai ashi.

Alliance Defending Freedom (ADF) International nung director of advocacy for Asia,

Tehmina Arora-i, lower court-i Sufyan Masih yimsü anema inyakbaji linük aser international ozüngtem alema inyakba lir, ta metetdaksü.

Arora-isa, "Court-i Sufyan Masih-i Khristan ama alitsü atema pa nem temeden agüja obendang agütsübaji onoki pelaa agizüker. Iba tatalokba ya ajanga Pakistan nung Khristantem bendanga züngshiba jangjar," ta metetdaksü.

Alima nung Khristantem alitsü linük tamajungtiba 50 rongnung Pakistan ya jenjang 7buba nung lir (Open Doors' 2024 World Watch List).

# ANOGO ABEN TSÜNGREM DEN

## Kibuba Anogo

*Kechiyong amman nung auer aruba amai Kibuba anogo arur ta nenoki nenok sasa jungjunga metet.*

*1 Tesa. 5:2.*

Kibuba anogo asoshi renema alitsü Laishiba nung Khristan masüba purtem dang masü, Khristantem dang ashi, aji asü nung dang parnoki Pa dang timi langzüksü. Kibuba anogo asoshi tongtipangtiba mapaji tejangja lir: Ibai meyimlaba mapang nung arutsü.

Laishiba nung Kibuba anogoji tetuyuba balala ashiba angutsü. Aiben ibai Yisu mezüngbuba mesüra tanabuba arutsü tetuyuba nung amshi, saka ano ibai Tsüngrem Pa nübur dang mashi mapang nung, tekümtet mesüra obendanga bener arutsü tetuyuba nunga amshi (Isa. 13:6; Yoel 2:11; Mal. 3:2). Kibuba anogoji nüburtemi bilemba dang nungi balaka asütsü ta, Amosi shin (Amos 5:18). Pa mapang nung nüburtemi Kibuba anogoji tepela aser ken tentepba mapang ka asütsü ta nüburtemi bilem, saka iba anogoji temenen o bendanga aser tejashi anogo asütsü ta Amosi ashi. Kodang Yisu mezüngbuba aru, Pai nüburtem süngmangdaksü kechiaser parnoki Messiahji yimya balaka nung arutsü bilem, aikati pa memetet.

Tatembang anogoji Yisu tanaben aruba alitsü. Kasa mapang nung Tsüngrem ne dangi, ner kibong dangi aser tembartem taküm nung, tembartem taküm nung aser külem inyaker taküm nung Tsüngremi mapa inyakba nai mita alitsü tenüngdaksü. Arogo pur rongnung Tsüngremi mapa balaka inyakba, nai metetta alitsüla. Taküm mapang nung tanga mapang dang nungi balaka Tsüngrem atenba metetta, nai tangar asoshi mepishitsütsü akok. Ne sasa renemang aser na meketa aliba nüburtem dak kechi ataloker metettang. Nai Kibuba anogo ana nung lir ta metetsü akok.

# Iran linük nung IRGC-i Khristan asem kanga reshikangshi

**December 01, 2024:** Taküm September ita nung Iran linük nung Islamic Revolutionary Guard Corps (IRGC)-i Khristan asem- Jahangir Alikhani, Hamed Malamiri aser Gholam Eshaghi nung apuba sülen ita ana tashi parnok kanga reshikangshiogo, ta meimchir temeden atema inyakba telok Article 18-i metetdaksü.

"Jahangir, Hamed aser Gholam nung dang mapang talanglang asüngdangyaba mapang nung parnok kanga reshikangshia liasü aser parnok dang, nenoki Khristan yimsü toktsür ta zülüang ta kangshia liasü," ta Article 18-i metetdaksü.

Yaküm Khristmas mapang nunga Ministry of Intelligence nungi ketdangsertemi Noshahr aser anasa aliba Chalun nung Khristan asemji densema Khristan 20 pua liasü saka tesülen chiok. Ajisüaka taküm September aser October ita na nung Khristan asemji tanaben apu aser parnok den nisung 9 densema Prosecutor office-i yok.

Islam yimsü anema parnoki tanga yimsü ka proker aser

bendanger sorkartem den amalitepa inyaker, ta Khristantem nem tai tonglokja liasü.

Article 18-i, "Parnok dang November 10 nü 1st Branch of Revolutionary Court of Nowshahr matsüngdangi arung ta tuyu, ajisüaka parnok atema ken o jembitsür peria maliba agi ken o angadangsü alibaji thina liasü," ta metetdaksü.

Khristantemji Pakistan Penal Code kübok Arrla 500 nung ajemdaker aitsü. Tamalen iba ozüng kübok aibelener Khristantem aika mapang talanglang tepuokdak yuogo. Iba ozüng ya yimsü temeden anema lir, ta Article 18-i metetdaksü.

"Ken o angadanga mapang nung parnoki parnok Khristan ta ashi, aser ibaji parnok tsüngda phone nung lemsatepba 'messages' ajanga jangjar. Parnok ket nungsa osangtajung kakettertem aser Khristan kakettertem liasü," ta Prosecutor Mohammad Reza-Ebrahimi-i metetdaksü.

Prosecutor-i, Khristan yimsü proktsü atema parnoki ozüng alema telok tentet," ta ashi.

Article 18-i, "Islamic Republic of Iran-ibo linüki recognize süa aliba minorities yimsü asem amangertem temeden küzmüker ta jembir, ajisüaka tanga yimsü toktsür Khristan yimsü agizükertemji Khristantem ama mezüngshir aser maneni apur. Tang tesüsa court-i aitsüba ajanga kuli tejangja sayur," ta metetdaksü.

October ita nung aitsüba Khristan 12 nungjagi katibo Islam yimsü den mapetba yimsü ka proker aser bendang linük sorkartem den amalitepa inyaker, ta tai tonglokja liasü. Kasa anogo nungjisa IRGC agent temi arrshi küm 40, Javad Amini apu.

November 17 nü Khristan asem- Jahangir Alikhani, Hamed Malamiri aser Gholam Eshaghi nung nem bail agütsüba anogo nung Javad Amini apu.

IRGC-i Amini den külemi par kinünger ka densema apu.

"IRGC indang garitemi Amini indang gari longbang aser pa den par kinünger ka na Sari nung aliba detention center-i anir ao. Agent tem jagi Javad indang gari jabi meshizükba sülen par kidangi

anir ao. Iba sülen pa kinüngtsü dang asüngdangyaa liasü.

Taoba hopta UN-i bangzüng ka renema Iran dang yimsü nung ajemdaker nüburtem mita maotsü aser yimsü nung ajemdaker jail nung puoka alirtem ajak chioktsü metetdakja liasü.

Taoba mapang Iran nung Shah'er jabaso, Reza Pahlavi-i, 1979 küm Islamic Revolution jakdangbo Iran ya yimsü temeden aliba tesem ka liasü, ta ashi.

November 19, 2024 nü pai X ajanga, Iran nung Khristantem den külemi Yihuda nung aser Baha'i lenirtem apur, linük toktsür jena aotsüsa akümer aser karbo tepseter, ta ashi.

"Tanüa maneni reshikangshir aser Iran nung Khristantem talisa Khristan yimsü dangi meyipertem Tenla kidangi aotsü memelar aser temeden balala magütsür," ta Pahlavi-i metetdaksü.

"Khristantemi linük security anema inyaker aser tsükchir linüktem den amalitepa inyaker aser bendangertem atema itdangitba mapa inyaktsür, ta tiyazü nung Khristantem nem

tai tongloktsür," ta paisa metetdaksü.

"Item ama tayongzükba aika liaka Khristantemi pei tamang jenjang nungi matsüngshir. Parnoki maneni timtem ajangshir aser parnoki alima nung Khristantem teyari nüngdaker," ta Reza Pahlavi-isa metetdaksü.

Pahlavi-i National Council of Iran tenteta lir aser tang iba telok ya Great Falls, Virginia nung amenoka lir. Tang Iran nung aliba sorkar anenba ajanga dang linük nung yimsü temeden aliba putu tasen ka tenzüksü, ta pai metetdaksü.

"Iran nung democratic sorkar ka ajanga dang yimsü ajak agizükterttsü. Küm aika yimsü temeden ya ozü linük sobaliba shilem ka liasü. Khristantem, Yihuda, Baha'is, Zoroastrians aser Muslim nung ano khen tesünep nung külemi litettsü aser reshikangshi metsübui sadoksadoka pei yimsü benschitettsü," ta paisa metetdaksü.

Alima nung Khristantem alitsü linük tamajungtiba 50 rongnung Iran ya jenjang 9buba nung lir (Open Doors' 2024 World Watch List).



AO OSHI ANGAZÜKDAK:

TANÜ ANGAZÜKTSÜBA OJANG

Tasüngdangba

(v) metetnua metetdaksüba (question)

\* NPSC tatidang nung tasüngdangba aika asüngdangder.

Tasüngsütsü

(n) tokolak nung tongtibang shilem ka (pterion)

\* Nisung dak tasüngsütsü nung süng long agi mejungi kongshira asür.



OLONG PAITEP # 6999

Crossword puzzle grid with numbers 1-17 indicating starting positions for words.

TIPLIN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S\_\_i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6998 TELANGZÜBA

TIPLIN :

- 1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

NAI-A YA METETTER MA



2012 nung 'longest uninterrupted call' atema Guinness Book of World Records nung zuluoka ayu. Harvard University nungi Eric R. Brewster aser Avery A. Leonard nati ghonda 46, minute 12 aser second 52 jembia liasü.

Iba call ya chitchat show nung shilem ka liasü aser world record yanglutsü atema tena second 10 den tali ola madoki mekazütsü telatetba liasü. Tena temang anema ayutsü atema ghonda shia minute 5 break agütsü.

Arunachal CM Khandu-i cleanest village semdang



Itanagar, December 1, 2024

(Agencies): Arunachal Chief Minister Pema Khandu-i East Siang district kübok Silluk semdangba ajanga terenlok mapa inyakba ajitetogo.

Silluk ya East Siang district nung yimtsüng temerüktiba lir aser CM Pema-i Siang region semdangba nung iba yimtsüng tongti semdangogo.

"Silluk Village ya merükmeju aser lipoküm tiptema aliba tesem ka lir. Chief Minister's Award for Cleanest Village kübok iba yimtsüngi khen dang masü saka asemen tashi 'Cleanest Village' naroküm

ngutetogo" ta CM Khandu-i ashi.

"Mebo Sub-Division nung alirtem aser talisa tetsürtemi merükmeju mapa inyakba ya jangratemtsüka. Parnoki Swachh Bharat Mission (Gramin) tangatetba atema bendanga agüja inyakba ajanga tangar ajungmesor" ta pai ashi.

"CM Khandu-i yimtsüng 10 nung temelenshi aika bentsür aruogo. Pa lenisüba ajanga asenok ajak nem teimla agütsür aser akasodaktsür" ta local MLA Oken Tayeng-i ashi.

Health & Family Welfare and WRD Minister Biyuram

Wahge, Women & Child Development, Cultural Affairs, and Science & Technology Minister Dasanglu Pul, APLA Speaker Tesam Pongte aser Advisor to HM Social Justice Empowerment & Tribal Affairs, Labour & Employment Rode Bui nungeri CM Khandu meina senzü.

"CM Khandu-i teti ajungmesoba aser mangdang ayuba atema pelar aser talisa pai Mebo ya Arunachal Pradesh nung green sub-division kümdaktsütsü merangba atema pelar" ta MLA Tayeng-isa metetdaksü.

Manipur sorkari ARagiener Langthabal Palace yanglushitsü

Imphal, December 1, 2024

(Agencies): Manipur nung putiotsü senmang takar wazüka ayutsü atema state sorkari Langthabal Palace yanglushitsü sentong renemogo.

Langthabal Palace ya King Gambhir Singh-i 1827 AD nung yanglu aser British yimsüsüba mapang nungi Assam Rifles-i amshia arur.

Assam Rifles anenzüktsü

atema infrastructure tasen yanglutsüba sentong nung Manipur Chief Minister N Biren Singh-i ashi.

Iba ali ya putiotsü nung kanga tongtipang lir aser mapang talangka iba tesem nungi security forces anientsü takhangba agüja arur Biren-i ashi.

Assam Rifles-i Manipur University campus den anasatepa aliba ali acre 10

toktsüogo aser tanünga acre 10 toktsütsü sentong lir.

Manipur sorkari palace yanglushitsü atema Rs. 20 crore lemzüksüogo aser iba mapa ya Tourism Department-i Art and Culture Department den asüngdangtepa inyaktsü.

State sorkari Assam Rifles nem ali tanga agütsüba atema pelar ta Major General Ravroop Singh, SM IG-IGAR (S)-i ashi.

December 2 nungi Kangpokpi-Churachandpur lapoktsü

Imphal, December 1, 2024

(TYO): Küm aika mokdanga aruba sülen December 2, 2024 nungi Churachandpur aser Sadar Hills tsüngda lenmang tongtiba lapoktsü.

November 25 nü MES mapa inyaker ka samaba sülen Leimakhong nung Army-i lenmang ajungbena shibanga

liasü saka Kuki-Zo nungeri lungkak aitsü tenzük.

"Iba lenmang ya onok asoshi kanga tongtipang lir" ta Committee on Tribal Unity (CoTU)-i metetdaksü.

November 30 nü Kuki-Zo nungeri lenmang lapoktsü atema takhangba agüja lungkak ait. Leimakhong Area

Protection Committee (LAPC) aser local civil society organizations-i lenmang lapoktsü atema jembitepa aru.

Ketdangsürtemi lenmang lapoktsü atema nisungtem aser talisa tetsürtemi mapa tajung inyakba atema tenüngsang agütsür ta CoTU-isa ashi.

Assam Rifles-i yimdaklirtem den külemi poppy alu raksatsü



Guwahati, December 1, 2024

(Agencies): Manipur nung Honibarnü Assam Rifles-i yimdaklirtem den külemi poppy alu raksatsüogo.

Central paramilitary force den yimdaklirtemi

district kübok Molanghat nung ali 2.5 square kilometers nung poppy alu raksatsü, ta Assam Rifles-i ashi.

Assam Rifles-i awareness campaigns agia aruba ajanga yimdaklirtemi

poppy alutem raksatsü ta parnoki ashi.

Assam Rifles aser yimdaklirtemi poppy alu ayimba dak sendakba ozüng alema maparen balala agientsü meranger.



### MENUNGRA BILEMTETER

Asür Mr. A. Imli Nokdir




02/12/2023 – 02/12/2024

Temiem Oba, nai onok toktsür orr tanü küm ka jungaka teti na onok den lir ama bilemer aser nü ajemalu, temiem aser shisatsü tajung mapang ajak nung bilemteter.

Tanü-a na menungra kinünger ajaki Oba nü nem aküm agüja sarasadema amonger a ni.

- *Temiem Kinungsü, jala-jabasotem, Semchirtem aser kinüngerem.*

### SÜR KÜM KA AJUNGBA BILEMTETER



Lt. Chungpongtemjen Ungma (2nd December, 2023)

Temeim Oba, nai onok toktsür or küm ka ajunger, saka onok mulungjang nung na teti alir. Ne temeim mapa aser ne sayu o tajungtem bilemtetera onok mulung süngzüker. Tanü na onok den meliaka onoki iba anogo na menungraseta sarasadema amonger.

### Pelaba Lemsateper



Onoki teti meima aliba **S. Arepla Mongchen**, 26th November 2024 anogo nung ajungbena iba akümüli tempangba mapang kija aser lokti tentet kwikati sarasadem, nübo aser rongsen agi ozü kinüngerem den yaritepogo; nenok ajak dang iba tezüluba ajanga kangasa pelaba lemsateper. Nenok temeim aser mapa tajung Teyanglur Tsüngremi maneni moajang ta onoki sarasadema atar. Iba den külemi kija aser lokti tentet kar metetshi-i melitetnung, parnok tenüng kar idagi shisemer:

1. Tenemtsuyong Ward Mangkolemba.
2. Mangkolemba Baptist Arogo.
3. Mongchen Senso Telongjem Mangkolemba.
4. ABAM Impur.
5. Jangpetkong Arogotem.
6. Shri. Temjen Pongen; Honble MLA & Advisor to the Govt. of Nagaland.
7. Mongchen Baptist Arogo.
8. Mongchen Village Council.

~ *Temeim Kinungertem.*

Office of the

### Mongchen Village Council

B.P.O Mongchen, P.O Mangkolemba – 798604

### TENÜNGSANG AGÜTSÜR

Mongchen Village Council ajanga senso tajung kwinakati mapa balala nung takok tajung ngutetogo, ajak dang pelar aser khunang tetushi agütsür.

1. Mr. Watilemba s/o Lt. Imnaangshi, for promoting to Dy. Commandant 12 I.R Battalion (NAP) Govt' of Nagaland.
2. Mr. Martemsu T Imchen s/o Mr. K Taketh Imchen, for securing SDO (Civil Engg.) PHE, Dept. Govt' of Nagaland.
3. Mr. Imlichuba Imchen, s/o R. Wati Imchen for securing the post of Fishery Inspector under Dept. of Fisheries and Aquatic Resources Govt' of Nagaland.
4. Ms. Chubamerenla Imchen, d/o Lt. Tamsunungsang for securing the post of Head Constable, Excise and Prohibition Dept. Govt' of Nagaland.

Pei tenzüka wadang nung tajungtiba agi nübur tenzüksü Mongchen Village Council ajanga ajungshir.

Sd/-

(BENDANGYANGER)

Chairman

Mongchen Village Council

## Taiwan dang prangbong injang ayonga atema China-i US aitsü

**Beijing, Luchii/December 1 (Agencies):** United State-i Taiwan dang prangbong injang tali ayoktsü atema temelaba agütsüba asoshi China-i telangzüba tapet agütsütsü nangzükogo. Taiwan tir William Lai Ching-te Hawaii ajanga aotsü ghonda ishika dang lia US-i iba temelaba agütsü aser iba ajanga ano Beijing tali jashidaktsüogo.

Deobarnü sangdong ka ajanga Ministry of Foreign Affairs-i ashiba agi, US-i Taiwan dang prangbong injang ayokba ajanga iba asetkong nung nüjiso atema raratem nem osang tai agütsür, aser iba ajanga China aser US na tesendaktep raksatsü.

“China-i iba inyakyim terenlok kanga junga asadanga attsü aser onük litsü aser sovereignty kümzüka ayutsü atema jenjang tapet agitsü,” ta kasa sangdong ajanga metetdaktsü.

Washington aser Taipei na

formal diplomatic tesendaktep meliaka temzüng ozük kübok Taiwan nem parnok kümzüka ayutsü atema teyari agütsütsü asoshi temzüng ozüng agi US alena lir. Iba ajanga Beijing aiben mepeladaktsü arudar.

China-i iba astkong ya parnok meyong ta ashiba ya Taiwan-i magizüki arudar.

US State Department-i, USD million 385 alang prangbong injang aser tang hadir balala ayoktsü atema temelaba agütsüogo, kong F-16 jets aser radar spare parts aser support densema lir. Lai-i Pacific nung linük asem semdangi mao tsüngda ghonda ishika lia US-i iba osang ya sangdonga liasü. Lai-i item linüktem semdangi aoba mapang Hawaii aser US meyong Guam tesem nung anenzüka liasü.

Foreign Ministry otongdari sangdong balaka ajanga Deobarnü ashiba agi, Lai anendaktsütsü atema US-i

anepalutsüba China-i aitsür. Iba tesem semdangba mapang pa Hawaii Governor Josh Green-i agizüka liasü.

Parnoki US inyakyim anemba metetdaktsüogo, ta kasa sangdong ajanga metetdaktsü.

Ministry-isa, parnok US aser Taiwan na official inyakyimtem kechi südir süaka ajak anemer ta shiogo.

China-i Taiwan ya parnok meyong ta shia arudar aser ken o ajak dang tongtibangtibaji iba linük aser Washington na tesendaktep ya lir ta shia arudar. China-isa, Lai ya kanga mesaklok aser pa ya “separatist” ka ta shia arudar.

Hawaii nung anenzükba mapang Lai-i Pearl Harbour nung USS Arizona Memorial semdang aser ashiba agi, rara nokdangtsü atema US aser Taiwan na longjemer inyaktsüla.

“Yimjungi kecha agi malizüktetsü aser rara nung takoker shinga mali,” ta pai ashi.

## Malaysia & Thailand tüzümsüng lendong nung nisung 12 süogo

**Kuala Lumpur, Luchii/December 1 (Agencies):** Tzünglu kanga sashia aruba ajanga Malaysia aser kidanger Thailand na nung tüzümsüng adokba sülen nisung 12 süogo, ta ketdangsürtemi metetdaktsü.

Northern Malaysia nung nisung 122,000 dak tema pei ki toktsür jena aotsüsa kümogo aser southern Thailand nung nisung 13,000 shi pei talidak ki toktsürogo.

Tzünglu kanga sashia arutsüba aser yipru maneni aittsüba indang tekümdangtsü metetdaktsür aliba mapang asürtem timba akümtsü akok ta tsüba bilemer.

Tüzümsüng ajanga taolen makai sabanger alirtem kümzüksü atema emergency services personnel tem yokogo aser nüburtem nem tejenokdak agütsüdar.

Item tesemtem ya iba hopta tetenzüklen nungi metsüng tenzüker aser linük anaprongla nungi nisung meyirejang aika anintsüsa kümogo.

Social media aser local new tem nung video balala ajanga ki aser gari metsünger aliba aser nüburtem teberem tashi tüzüagi metsünger aliba yimtungtem nung senzüba nguogo.

Thailand kübok Sateng Nok district nung agiba video ka nung tekümsükertemi kinü tanur ka tüzü agi metsünger aliba kilem ka nungi kümzüka nguogo.

Southern Thailand nung tüzümsüng agi nisung 534,000 shi dak kongshio, ta disaster

ketdangsürtemi metetdaktsüba den, tüzümsüng ajanga medical facility tem raksatsütsü aliba nungi jenboa alitsü atema mozüki ana shibangtsüsa kümogo, ta shisem.

Tüzümsüng ajanga province trok nung timtem lendong tesashi adoker aliba sangdongogo.

Sorkari tüzümsüng agi kongshir aliba province ajak nem baht million 50 (\$1.7m; £1.3m) agütsüogo aser Ato Kilonser Paetongtarn Shinawatra-i ashiba agi, parnok nükjidongji takokba tashi takaratiba nung tensa azüoka taoba mapang ama kümdaktsütsü asoshi lir.

Malaysia nung tüzümsüng ya Thailand den arrtsü nung north-east nung aliba Kelantan state nung ataloka liasü.

Iba state indang National Disaster Management Agency-i ashiba agi, tüzümsüng lendong nungi aninertem ya nütsünyongsük shilem 63 liasü.

Kelantan kübok Pasir Puteh jila nung alir kati ashiba agi, la aliba tesem Bodhbarnü nungi metsünger lir.

“Tüzümsüng ozü corridor tongogo aser ki telungi aittsü atema inch ishika dang anunga lir,” ta Zamrah Majid-i AFP news agency dang ashi.

Kasa jila nung alir kati ashiba agi, pa aser par kibong tüzümsüng ajanga tangar dang nungi piladaktsüogo. “Onok aliba tesemi gari aittsü aser tugutsü kecha lenmang mali,” ta Muhammad

Zulkarnain-i AFP dang ashi.

Maneni Malaysia nung tüzümsüng agi state ti kongshir lir.

Tang tashi nung tüzümsüng ajanga jenshirtem 2014 küm dang nungi timba kümogo. Iba küm linük tüzümsüng agi kanga mejungi kongshia liasü.

Disaster management atema tenüngdakba oset balala Terengganu aser Kelantan State sorkar dangi yokogo, ta Ato Kilonser office sangdong ka ajanga metetdaktsü.

Hokolbarnü, Ato Kilonseri timtem lendong ataloker aliba dak rangloker inyaktsü atema cabinet züngsemtem tem leave magitsü tetuyuba agüja liasü.

Malaysian Meteorological Department-i, state kar nungbo Deobarnü tashi tüzünglu kanga sashia arutsü ta takzütsüogo aser kasa mapang nung Thailand nunga Meteorological Department-i tüzünglu ya taruba hopta tashi kanga sashia arutsü akok ta shiogo.

Linük anaprongla nung tang mapang ya tüzüngluruwa mapang lir aser iba mapang tüzümsüng agi aiben timtem agüja arudar.

2021 küm Malaysia nung küm aika sülen tüzümsüng tamajungtiba aru aser iba lendong nung nisung 14 taküm sama liasü.

Kasa mapang nung 2011 küm Thailand kübok tesem balala tüzümsüng agi kanga mejungi kongshiba sülen nisung 500 asü aser ki million aika raksaja liasü.



## England-i wicket ti agi New Zealand kokogo



**Luchii/December 1, 2024 (Agencies):** England aser New Zealand na mezüngbuba Test asaya England-i Deobarnü wicket ti agi kokogo. Tanabuba innings nung parnokki asaya akoktsü atema NZ-i yanglua toktsüba run 104 ya over 12.4 nung menepa liasü.

Deobarnü Christchurch nung New Zealand pur run 254 nung asayar ajak out sütsüba sülen Jacob Bethell-i tatemangbuba run yanglua parnokki asaya akok. Pai iba asaya nung ball 37 nung half century yanglua liasü. Joe Root-ia ball 15 nung out mesüi run 23 yanglu.

New Zealand pur Deobarnü tanabuba innings ya asayar 6 out sür run 155 yanglur lia tenzük aser ghonda ana dak tema kanga meranga asaya-a parnokki run 254 yanglu aser run 103 agi parnok tejakdang aküm.

NZ team nungi Daryl

Mitchell-i kanga meranga asaya run 84 yanglu aser Will O'Rourke den tatemangbuba wicket magidaktsüi over 13 tashi kanga merang asaya liasü.

England nung bowler Brydon Carse-i tanabuba innings nunga wicket trok agia ajak senteper wicket 10 agia liasü.

Asaya akoktsü atema run 104 yanglutsü ya England asoshi tasak masü asü, shirnoki afternoon session tom nungbo asaya kokatok.

Parnok rongnungi Zak Crawley tanabuba over nung Matt Henry-i out sütsü aser Ben Duckett-a ball 18 nung run 27 yanglur lia O'Rourke-i out süja liasü.

Kidang mezüngbuba asaya nung tamakok anguba sülen New Zealand team World Test Championship final asayatsü timla makai kümogo. India 3-0

agi akokba sülen parnok final atema qualify asütsü timla liasü.

England team-i mezüngbuba innings nung run 499 yanglua parnok 151 agi tejakdang aküm, saka New Zealand puri catches tem aibelen mesüi apu asübo asaya melenshir lila.

Harry Brook run 18 yanglur aliba mapang out sütsütsü maongka anguba magiteti catch drop asü aser Stokes-a run 50 yanglur aliba mapang drop süa liasü. Maneni Duckett-a (46) run 25 yanglur aliba mapang catch drop süa liasü.

Iba asaya nung Brook-i run 171 yanglu. Pa catch out sütsütsü ponguben tashi maongka angu saka NZ puri aji magitet.

Tanabuba Test ya Wellington nung Hokolbarnü tenzüktsü. Tasembuba aser tatemangbuba test ya Hamilton nung December 14 nü tenzüktsü.

## WPL 2025 auction Bengaluru nung agitsü

**Luchii/December 1, 2024 (Agencies):** Tasembuba Women's Premier League (WPL) atema renemdar aser iba atema tongtibang tinyaktsükaji mini-auction ya asütsü, koba Bengaluru nung December 15 nü agitsü.

Cricbuzz sangdong ka ajanga ashiba agi, Board of Control for Cricket in India (BCCI)-i franchise ponguprongla dang auction agitsüba anogo aser tesem indang osang agütsüogo aser iba ajanga parnok tasa asatsü asoshi maongka agütsütsü.

Iba mini-auction ajanga franchise tem nem slot 19 süngdaktsütsü asoshi maongka agütsütsü, kong India nung asayar 14 aser bendanger asayar 5 densema alitsü. Team ajak senteper sen crore 16.7 intoktsü anunga lir. Franchise ajak nem sen crore 15 intoka squad yanglutsü temelaba agütsür.

Iba den bendenloksema team shia nung asayar 18 alitsü aser bendanger asayar ajak agi trok alitsü.

Taoba season nungi asayartem meyipa agiba sülen Gujarat Giants pur jenang

tajungba nung lir aser parnokki sen crore 4.4 intoka asayar pezü alizüktsü maongka lir. Senotsü intoktsü maongka aliba ajanga tongtibang asayartem alizüka parnok team yanglushitsü asoshi maongka agütsütsü.

BCCI-i, asaya 22 asayatsü aliba asayamung ya kodang ayongzüka asayatsü iba indang osang tejangja magütsü, ajisüaka February aser March na tsüngda asayatsü imlar. Royal Challengers Bengaluru pur ya defending champions lir aser iba takok dak ajemdaker parnokki taküma iba tite abentsü merangtsü imlar.

Asayar ajak senteper 71 franchise temi meyipa agiogo, kong international asayar 25 densema lir.

**Royal Challengers Bengaluru:** Smriti Mandhana, Sabbhineni Meghana, Richa Ghosh, Elysse Perry, Georgia Wareham, Shreyanka Patil, Renuka Singh Thakur, Sophie Molineux, Ekta Bisht, Kate Cross, Kanika Ahuja, Danni Wyatt-Hodge.

**Mumbai Indians:** Harmanpreet Kaur, Yastika Bhatia, Amelia Kerr, Chloe

Tryon, Hayley Matthews, Jintimani Kalita, Nat Sciver-Brunt, Pooja Vastrakar, Sajeewan Sajana, Shabnim Ismail, Saika Ishaque, Amanjot Kaur, Amandeep Kaur, Keerthana.

**Delhi Capitals:** Meg Lanning, Shafali Verma, Jemimah Rodrigues, Taniya Bhatia, Alice Capsey, Annabel Sutherland, Marizanne Kapp, Radha Yadav, Shikha Pandey, Arundhati Reddy, Jess Jonassen, Titas Sadhu, Minnu Mani, Sneha Deepthi.

**UPWarriorz:** Alyssa Healy, Kiran Navgire, Shweta Sehrawat, Deepti Sharma, Chamari Athapaththu, Grace Harris, Sophie Ecclestone, Tahlia McGrath, Rajeshwari Gayakwad, Saima Thakor, Anjali Sarvani, Gouher Sultana, Poonam Khemnar, Uma Chetry, Vrinda Dinesh.

**Gujarat Giants:** Beth Mooney, Laura Wolvaardt, Phoebe Litchfield, Ashleigh Gardner, Harleen Deol, Dayalan Hemalatha, Tanuja Kanwer, Mannat Kashyap, Meghna Singh, Shabnam Shakil, Bharti Fulmali, Kashvee Gautam, Priya Mishra, Sayali Satghare.

## Hi-i Junior Women's Squad sangdongogo

**Luchii/December 1, 2024 (Agencies):** Hockey India-i Deobarnü taruba women's Junior Asia Cup atema asayar 20 tenüng sangdongogo. Iba team ya Jyoti Singh lenisüba nung asayatsü. Asayamung ya Muscat, Oman nung December 7 nungi 15 tashi asyatsü.

India team-i taoba küm iba asayamung final nung South Korea goal 2-1 agi koka liasü.

Iba asayamung ya FIH Hockey Junior World Cup 2025 atema qualifier lir. Iba asayamung kong ayongzüka asayatsü iba indang tang tashi sangdonga mali.

Women's Junior Asia Cup nung team 10 pool ana kuma lemsar asayatsü.

India team Pool A nung China, Malaysia, Thailand, aser Bangladesh den ata lir aser Pool B nung South Korea, Japan, Chinese Taipei, Hong Kong China, aser Sri Lanka lir.

India team vice-captain Sakshi Rana asütsü.

Team nung goal keeper Nidhi aser Aditi Maheshwari na asütsü aser defence nung

Manisha, Jyoti Singh, Lalthantluangi, Pooja Sahoo, aser Mamata Oram nung asayaba angutsü.

Midfield nung Vaishnavi Vitthal Phalke, Sunelita Toppo, Ishika, Rajni Kerketta, Sakshi Rana, aser Khaidem Shileima Chanu nung amala sempet tajung aketba asayartem lir.

Maneni forward asayatsü atema Deepika, Beauty Dungdung, Kanika Siwach, Mumtaz Khan, aser Lalrinpui nung shimogo.

Binima Dhan aser Himanshi Sharad Gawande na reserve asayar asütsü.

Deepika, Vaishnavi Vitthal Phalke, Sunelita Toppo, Mumtaz Khan aser Beauty Dungdung nung Indian women's senior national team nungia asayaogo.

Coach Tushar Khandker-i ashiba agi, "women's Junior Asia Cup nung onok indang title defend asütsü yongya atar.

Team nung tajangshiba bener aliba asayartem aser asayar tasentem meyoktepa lir.

Asayartem akati senior jenjang nung parnok sempet sayuogo aser parnokki team anitsü."

## Abbott aser Doggett na Australia team nung züngoksemogo

**Luchii/December 1, 2024 (Agencies):** Australia-i India den tanabuba test asaya atema linük team nungi khen danga masayai aliba asayar Sean Abbott aser Brendan Doggett na shimogo. Seamer Josh Hazlewood yiruba sülen tena ya shima liasü.

Cricket Australia-i ashiba agi, Hazlewood yiruba sülen pa Adelaide Oval nung day-night asayatsü aliba nung masayatetsü.

Arishi küm 33 tain asayar shibai Test asaya 71 nung wicket 278 agia lir pa Adelaide nung Australia indang squad den dang alitsü aser asayamung nung tanungba asayatem atema renemtsü.

India den mezüngbuba test asayaba mapang Australia nung bowler tem rongnungi Hazlewood-i ball tajungba onteta pai run 29 agütsür wicket 4 agia liasü. Iba innings nung India-i run 150 dang yangluteta liasü.

Tanabuba test asaya koba Dcember 6 nü nungi tenzüktsü lir iba Test nung pa melena asayar tejen Scott Boland ang asayadaktsütsü imlar.

Abbott-i Australia tenüng nungi ODI asaya 26 nungi wicket 29 aser T20 asaya 20 nung wicket 26 agir lir, saka pa linük tenüng nungi Test ka nung danga asaya mali.

Pai first-class asaya 87 nung wicket 261 agir lir.

Kasa mapang nung Doggett-i Australia tenüng nungi khen danga asaya mali. Pa 2018 küm Pakistan den Test asayamung atema squad nung züngoksema liasü.

Arishi küm 30 tain shibai first-class asaya 40 nung wicket 142 agir lir aser October ita India A den asayaba mapang pai run 15 agütsür wicket 6 agia liasü.

Tasmania all-rounder Beau Webster-a Mitchell Marsh melentsüpur ama squad nung züngosemogo, shiba temang mejungi lir.

### Australia team:

Usman Khawaja, Nathan McSweeney, Marnus Labuschagne, Steven Smith, Travis Head, Mitchell Marsh, Alex Carey, Josh Inglis, Pat Cummins (c), Mitchell Starc, Nathan Lyon, Sean Abbott, Brendan Doggett, Scott Boland, Beau Webster.

## BILEMDANGANG

"Kong mangdang mali,  
yangji teimla-a malir."